

大方廣佛華嚴經卷第二十三

卷三

唐罽賓國三藏般若奉詔譯

入不思議解脫境界普賢行願品

爾時善財童子得此菩薩甚深自在可愛妙

音解脫正念思惟增長廣大精勤顯示普徧

修行即時往詣開敷一切樹華安樂主夜神

所見其身在衆寶香樹枝條樓閣之內坐大

寶樹妙藏師子之座十千夜神前後圍遶善

財童子頂禮其足於前合掌而作是言聖者

我已先發阿耨多羅三藐三菩提心而未知

菩薩云何學菩薩行云何修行成就增長得

一切智唯願慈哀爲我宣說夜神告言善男

子我於此娑婆世界日光已沒蓮華覆合諸

人衆等罷遊觀時見其一切若山若水若城

若野若異國土如是等處種種衆生咸悉發

心欲還所住迷失道路惶怖不安我皆密護

令其無畏爲放光明示以正道達其處所令

免衆苦宿夜安樂若有衆生病苦逼惱於夢

寐中令其安樂善男子若有衆生盛年好色

愛著縱逸五欲自恣驕慢醉心我爲示現老

病死相令生恐怖捨離諸惡永斷無明離生

死怖復爲稱歎種種善根令其修習爲慳慳

者讚歎布施爲破戒者稱揚淨戒有瞋害者

令行慈忍若懈怠者令起精進若散亂者令

修禪定住惡慧者令學般若樂小乘者令住

大乘勤修一切善巧方便樂著三界諸趣中

者令住菩薩願波羅蜜若有衆生福智微劣

爲諸結業之所逼迫種種障礙不自在者令

住菩薩力波羅蜜若有衆生其心闇昧無有

智慧著我我所種種昏蔽令住菩薩智波羅

蜜

蜜善男子我得菩薩出生廣大歡喜光明解脫門善財白言聖者此解脫門境界云何夜神言善男子入此解脫能知如來種種福聚普攝衆生善巧方便智慧光明云何普攝善男子一切衆生所受諸樂皆是如來威德力二故順如來教故行如來語故學如來行故得如來所護力故修如來所印道故種如來同類善根故讚如來相似善果故守護如來所說戒法故隨喜如來廣大誓願故如來平等智慧日光之所照故如來性淨圓滿業力之所攝故以如是故一切世間種種安樂出現成就云何知然善男子我入此出生廣大歡喜光明解脫門時正念思惟毗盧遮那如來應正等覺往昔所修菩薩行海隨順觀察悉皆明見善男子世尊往昔爲菩薩時見一切

衆生著我我所住無明暗室入諸見稠林爲貪愛所縛忿怒所壞愚癡所亂慳嫉所纏種種煩惱逼擾身心生死輪迴貧窮困苦不得值遇諸佛菩薩我見是已起大悲心爲欲利益一切衆生所謂起願得一切妙寶資具攝

衆生心願一切衆生皆悉具足資生之物無所之心於一切衆事離執著心於一切境界無貪染心於一切所有無慳吝心於一切布施無疑惑心於一切果報無希望心於一切榮好無羨慕心於一切因緣無迷惑心起三觀察真實法性心起救護一切衆生心起三深入一切諸法自性漩澗心起於一切衆生住平等大慈心起於一切衆生行方便大悲心起爲大法蓋普覆衆生令無熱惱心起以大智金剛杵破一切衆生煩惱大障山心起令一

切衆生速疾增長廣大喜樂心起願一切衆生究竟成就極安樂心起隨一切衆生所欲雨一切財寶心起以平等方便成熟一切衆生心起令一切衆生滿足聖財心起願一切衆生究竟皆得十力智果心起如是心已得菩薩力現大神變徧滿虛空最勝法界於一切十方諸衆生前起一切相一切財一切布施無緣大雲普雨一切衆寶瓔珞資生之物隨諸衆生心之所欲悉滿其意皆令歡喜如是無量布施攝門種種財物恒行惠施於一切時常無休息不悔不恪無間無斷以是方便普攝衆生教化成就具足圓滿皆令得出生死苦難救護饒益不望其報作意平等心無分別淨治一切衆生心寶令其生起於一切佛一相深密同一善根應衆生心作衆資

具攝取衆生增一切智速疾圓滿福德大海菩薩如是於念念中盡無餘界調伏成熟一切衆生令其皆得最勝清淨念念嚴淨一切佛刹令無雜穢念念普入一切法界念念皆悉徧虛空界念念普入一切三世念念以方便智調伏衆生念念恒於一切世界普轉一切不退法輪念念恒以一切智道善巧利益一切衆生念念普於一切世界種種差別諸衆生前盡未來劫現一切佛成等正覺念念普於一切世界一切諸劫修菩薩行不生二想所謂普入一切廣大世界海一切世界種中所有的一切種種際畔諸世界種種莊嚴諸世界種種體性諸世界種種形狀諸世界種種分布諸世界或有世界穢而兼淨或有世界淨而兼穢或有世界一向雜穢或有世界

一向清淨或有廣大或有狹小或高或下或
羸或妙或正或側或覆或仰或圓或方或非
圓方如是一切種種名字形像莊嚴諸世界
中念念修行諸菩薩行入菩薩住現菩薩力
亦現三世一切佛身隨衆生心普使知見速
疾增長一切智福德海門善男子毗盧遮那
如來於過去世如是修行菩薩行時見諸衆
生不修福德無有智慧遠離慚愧著我我所
無明業障出生種種不正思惟入諸邪網惡
見稠林不識因果煩惱業迷惑其心不得
自在墮於生死險難深坑具受種種無量諸
苦起大悲心修習一切波羅蜜行為諸衆生
稱揚讚歎堅固善根令其安住遠離生死貧
窮困苦勤修福智助道之法為說種種諸因
果門為諸業報不相違反為說於法證入之

光三

五

處為說一切衆生欲解及說一切受生國土
令其不斷一切佛種令其守護一切佛教令
其捨離一切諸惡又為稱歎趣一切智助道
之法令諸衆生心生歡喜令行法施普攝一
切令其發起一切智行令其修學諸大菩薩
波羅蜜道令其增長成一切智諸善根海令
其滿足一切聖財令其得入佛自在門令其
攝取無量方便令其觀察如來威德令其親
近隨順如來寂靜安樂令其安住成就菩薩
種種智慧爾時善財童子白言聖者發阿耨
多羅三藐三菩提心修此妙行其已久如夜
神告言善男子如汝所問此事難知難信難
解難證難入難可顯示難可生起難可演說
一切世間諸天及人聲聞獨覺皆不能知唯
除如來威力所加善知識所攝修習廣大福

德智慧其心堅固欲樂清淨無下劣心無雜
染心無諂曲心無散亂心無鄙恪心無極暗
心得普照耀開敷一切智光明心發普利樂
成就一切諸衆生心一切煩惱及以衆魔無
能壞心起必趣向一切種智無障礙心不樂
世間一切生死染汙樂心能樂觀察一切如
來清淨妙樂能勤除滅一切衆生憂悲苦海
能修一切諸佛如來功德法海能觀一切諸
法實性虛空境界能具一切廣大甚深清淨
信解能超一切生死暴流能入一切如來智
海能決定到無上法城能勇猛入如來境界
能速疾趣諸佛智地能即成就一切智力能
於十力已得究竟如是之人乃能於此能知
能入能信能解能持能了隨順修行何以故
此是如來智慧境界一切菩薩尚不能知况

卷三

六

餘衆生然我今當承佛威力欲令調順可化
衆生意速清淨欲令修習善根衆生心得自
在隨汝所問爲汝宣說爾時開敷一切樹華
安樂主夜神欲重明此義觀察三世如來境
界而說偈言

佛子汝今之所問 諸佛無邊深境界
難思刹海微塵劫 具足演說無能盡
非諸弊惡貪恚癡 憍慢無明惑所覆
垢心纏縛衆生等 能知諸佛寂靜法
非諸諂誑濁亂心 常隨慳嫉情無捨
煩惱業繩之所繫 而能了知佛境界
非是執著蘊界處 心恒不捨於身見
心倒想倒見倒人 能入如來寂滅地
寂靜甚深諸佛境 本性真常離分別
非著諸有生死人 入此平等無依法

生於諸佛種姓家	一切如來恒守護
能持法王教藏者	此仙智眼之境界
親近真實善知識	愛樂白法無厭足
專求佛力受法雲	彼聞此法生歡喜
心恒清淨無分別	不著一切如虛空
智燈自在破無明	此無垢者之境界
以大慈悲覆世間	徧入三世衆生海
隨宜利樂無邊際	此深行者之境界
心常歡喜無諸著	一切所有皆能捨
樂說平等施衆生	此無著者之境界
心無垢濁離諸過	究竟調伏無憂悔
隨順佛教能具修	此無垢者之境界
心無動亂無分別	能普覺知諸法性
遠離一切諸惑業	此解脫者之境界
心無疲厭常無退	勇猛勤修一切智

安住增上淨戒中	此大丈夫之境界
其心深入諸三昧	究竟清涼無熱惱
已修一切智海因	此寂靜者之解脫
了知諸法差別相	善入無邊深法界
普度羣生靡有餘	此慧燈者之解脫
了達衆生真實性	於諸有海無所著
如影普現心水中	此先導者之解脫
從於三世諸佛海	方便願種而出生
盡諸劫刹勤修行	此普賢者之解脫
普入一切法界門	悉見十方諸刹海
亦見其中劫成壞	此無二者之境界
十方刹海極微中	悉見佛坐菩提樹
成等正覺化羣生	此無礙眼之境界
汝從無量大劫海	親近承事善知識
爲利羣生求正法	聞已憶念無遺忘

毗盧遮那廣大境 無量無邊難思議

我承佛力為汝說 今汝深心轉清淨

善男子乃往古世過世界海極微塵數劫有
世界海名毗盧遮那海真金摩尼山彼世界
海中有佛出現名普照法界智慧山寂靜威
德王善男子其佛往修菩薩行時能普清淨
彼世界海其世界海中有佛刹極微塵數世
界種一一世界種有佛刹極微塵數世界一
一世界有世界極微塵數劫一一劫中無量
如來出興於世一一如來說世界海極微塵
數修多羅一一修多羅授佛刹極微塵數諸
菩薩記現種種佛神通力說種種調伏衆生
法轉種種諸乘輪度無量衆生海善男子彼
毗盧遮那海真金摩尼山世界海中有世界
種名普門現前莊嚴幢此世界種中有世界

名一切寶色吉祥普照光明以現一切化佛
影像摩尼王為體形如天城以現一切如來
菩提道場摩尼寶王而為莊嚴住於一切寶
拘蘇摩華海上淨穢相雜此世界中有須彌
山極微塵數四天下有一四天下最處其中
名一切寶山幢其四天下——縱廣無量百
千由旬——各有一萬大城其閻浮提中有
一王都名妙寶娑羅莊嚴雲燈以十十大城
而為眷屬周而圍遶閻浮提人壽萬歲時中
有輪王名一切法圓滿蓋大吼聲其王具有
五百輔臣六萬姊妹女七百王子其諸王子色
相端嚴勇健雄猛有大威力爾時彼王威德
普被閻浮提內無有怨敵時彼世界劫欲盡
時有五濁起一切人衆壽命短促資財乏少
形色鄙陋行住坐卧多苦少樂不修十善專

作惡業更相忿諍互相傾奪欺誑詐偽綺飾
言辭離間於他發麤惡語妬他榮好非法貪
求深入邪網稠林曠野以是因緣風雨不時
苗稼不登藥木華卉園林草樹一切枯槁衣
食匱乏多諸疫病馳走四方靡所依怙咸來
共遶王都大城無量無邊百千萬億四面周
匝高聲大叫或舉兩手或復合掌或以頭叩
地或舉手椎胸或屈膝長號或涌身大叫頭
髮鬢亂衣裳弊惡皮膚皴裂面目無光彼諸
衆生以種種形貌出種種音聲作種種言辭
爲種種談說而白王言大王我等今者貧窮
孤露飢渴寒凍疾病衰羸衆苦所逼種種困
厄迫切身心命將不久無依無救無所控告
如在牢獄死相現前我等今者來歸大王我
觀大王仁慈智慧於大王所生得安樂想得

憐愍想得受敬想得身命想得攝受想得寶
藏想遇津梁想逢道路想值船筏想見寶洲
想獲財利想升天宮想離怨家想滅衆苦想
爾時大王聞此語已獲得百萬阿僧祇大悲
門一心思惟作意觀察發於十種大悲之語
云何爲十所謂哀哉衆生墮落無底生死深
坑我當云何而速免濟令其得出安住如來
一切智地哀哉衆生爲諸煩惱逼迫身心我
當云何而作救護安住種種善業道中哀哉
衆生恒爲種種生老病死之所恐怖我當云
何爲作歸依令離縛著求得一切身心安隱
哀哉衆生常爲世間種種恐怖逼害其身我
當云何而爲救護令其得免一切厄難安住
如來一切智道哀哉衆生無有智眼常爲身
見疑惑所覆我當云何爲作方便令其得決

疑見賢瞋哀哉衆生常爲癡暗之所迷惑遠
離善法我當云何爲作慧炬照彼無明令其
顯現一切智城究竟解脫哀哉衆生常爲種
種慳嫉諂誑濁亂其心我當云何而爲開曉
令其證得清淨法身哀哉衆生長時漂溺一
切世界生死大海我當云何爲作船筏而普
運度令其得入一切智海哀哉衆生諸根剛
強遠離調御無上大師一切世間無能調者
我當云何而爲調御令其成熟一切善根具
足如來大威神力哀哉衆生猶如盲瞽不見
正道隨逐邪徑我當云何開其慧眼而爲引
導令其得入一切智門時彼大王興此十種
大悲之心作是語已即於王都大衆之中擊
鼓宣令咸使聞知我今普施一切衆生隨有
所須悉令充足即時頌下閻浮提內大小諸

卷三

十一

城及諸聚落悉開庫藏出種種物置四衢道
所謂金銀琉璃摩尼等寶衣服飲食華香鬘
蓋塗香末香種種瓔珞宮殿屋宅牀榻敷具
一切資財無不備足建大光明摩尼寶幢其
光觸身悉使安隱滅除黑暗開發照明隨心
所欲皆悉圓滿又復隨化種種身形一切承
事供養恭敬一切衆生亦施一切病緣湯藥
活命資具種種寶器盛衆雜寶所謂金剛器
中盛種種香寶香器中盛種種衣摩尼妙寶
莊校嚴飾輦輿車乘衆寶瓔珞寶帳寶網周
圍垂覆建立種種高勝妙幢如是一切資生
之物悉開庫藏而以給施亦施一切村營城
邑山澤林藪妻子眷屬及以王位頭目耳鼻
脣舌牙齒手足皮肉心腎肝肺大腸小腸脂
膏筋脉一切支分內外所有悉皆能捨爾時

妙寶娑羅莊嚴雲燈王城東門名摩尼山威
德於其門外有施會處其地廣博清淨平坦
無諸坑坎荆棘沙礫一切皆以妙寶所成散
衆寶華燒諸妙香無數摩尼王寶莊校嚴飾
然諸寶燈周徧照耀寶焰吉祥威德香雲充
滿虛空無量寶樹次第行列微妙分布間錯
莊嚴種種天人宮殿樓閣種種莊嚴種種幢
幡種種繒蓋常出光明寶拘蘇摩網一切香
王寶網彌覆其上寶鐸徐搖出妙音聲無量
百千億那由他諸音樂器恒出妙音如是一
切皆以妙寶而爲莊嚴悉是菩薩淨業果報
之所成就於彼會中置師子座十種妙寶以
爲其地十寶欄楯放大光明十種寶樹枝葉
扶疎周而圍遶靡不嚴好微妙堅固金剛寶
輪以承其下以一切寶爲龍神像而共捧持

卷三

十二

種種寶物以爲嚴飾於交露間標題德相以
種種色間錯莊嚴一切寶幢一切寶幡周徧
行列衆寶鈴網摩尼寶網衆寶華網大摩尼
王網以覆其上無量寶香常出香雲種種寶
衣處處分布百千種樂出過諸天恒奏美音
悅可人意復於其上張施寶蓋常放無量寶
焰光明如閻浮金熾然清淨垂諸華纓無數
摩尼寶王爲帶周迴間列種種雜色摩尼寶
鈴恒出妙音勸諸衆生修行十善時一切法
圓滿寶蓋大師子吼妙音聲王處師子座具
足妙色形容端正人相圓滿最勝清淨世無
能比毗盧遮那摩尼寶王以爲其冠那羅延
身不可沮壞一支分悉皆圓滿性普賢善
王種中生於財及法皆得自在辯才無礙智
慧明達以正治國無違命者一切衆生咸讚

彼王無量無邊殊勝功德光明熾盛過天帝
釋見者無厭常於空中現大輪蓋摩尼寶藏
其數百千以爲輪輻無數寶焰吉祥威德光
明莊嚴閻浮檀金放清淨光以覆其上種種
寶色金網莊嚴真珠瓔珞周垂下又以寶
繩懸衆寶鈴衆寶莊校恒吐妙音過諸天樂
覺悟世間宣揚善行復有妙扇寶縷織成扇
以香風發揚威德爾時於此閻浮提內無量
無數百千萬億那由他衆生種種國土種種
族類種種眷屬種種形貌種種衣服種種言
辭種種心行種種欲樂各各希求種種財寶
種種資生種種受用俱來此會觀察彼王以
種種言語種種訓釋種種辯才種種名句咸
歎此王是大智人是福須彌是勝功德圓滿
白月是得自在無礙丈夫住菩薩願行廣大

施時王見彼諸來集會於已乞求生愛敬心
生悲愍心生歡喜心生尊重心生廣大心生
善友心生相續心生精進心生不退心生捨
施心生周徧心生平等心生清淨心生成就
心生速疾心生見種種善知識心善男子爾
時彼王見諸乞者心大歡喜經須臾頃假使
轉輪聖王盡無邊劫所受快樂所不能及如
是忉利天王夜摩天王兜率陀天王盡百千
億那由他劫所受快樂亦不能及善化天王
於無數劫所受快樂自在天王於無量劫所
受快樂大梵天王於無邊劫所受梵樂光音
天王於難思劫所受天樂徧淨天王於無盡
劫所受天樂淨居天王不可說劫住寂靜樂
悉不能及譬如有人仁慈孝友遭逢世難父
母兄弟姊妹妻息內外宗親普皆散夫忽於

曠野道路之間而相值遇瞻奉撫對情無狀
足時彼大王見來乞者心生愛敬歡喜踊躍
慶幸之心亦復如是善男子其王爾時因善
知識於佛菩提解欲增長諸根成就信心清
淨歡喜圓滿不可思議何以故此大菩薩勤
修諸行求一切智願得利益一切衆生心無
懈倦願得充足一切衆生衣服飲食願獲善
提無量妙樂捨離一切諸不善心常願積集
一切善根常願救護一切衆生常樂觀察薩
婆若道常樂修行一切智法滿足一切衆生
所願入一切佛功德大海破一切魔業惑障
山隨順受持一切佛教行一切智無障礙道
已能深入一切智流一切法流常現在前大
願無盡爲大丈夫住大人法積集一切普門
善藏願捨一切執著之心不染一切世間境

界知諸法性猶如虛空於彼一切諸來乞者
生一子想生父母想生福田想生善友想生
難得想生恩益想生覆護想生堅固想生導
師想生如來想不揀方處不擇族類不選形
貌隨有來至如其所欲隨其方處隨其國邑
如彼所求如彼愛樂以大慈心平等無礙以
大捨光照明一切應衆生心今無所乏求飲
食者施與飲食求衣服者施與衣服求香華
者施與香華求鬘蓋者施與鬘蓋如有求
幢幡瓔珞宮殿苑象馬車乘牀座被褥金
銀摩尼真珠瑠璃璧玉珂貝諸珍寶物一切
庫藏及諸眷屬姝女妃嬪城邑聚落園林屋
宅皆悉如是普施衆生

大方廣佛華嚴經卷第二十三

音釋

漩復漩旬宣切
 薄紅切
 髮亂也
 也疾音歷小
 礫石也
 珂貝珂丘切
 大者為珂貝博蓋切
 裂裂水切
 力七倫切
 薛切皮細起也
 何裂破也
 珂切螺屬貝之目
 枯槁枯老切
 亦槁也
 醫壹計